



Promocija inicijative za proglašenje „Svjetskog dana izbora“

„Mjesec promocije slobodnih i demokratskih izbora“

15. januar -15. februar 2016. godine

I Z V J E Š T A J

Februar, 2016. godine

Centralna izborna komisija Bosne i Hercegovine je i ove godine, 11. put po redu inicirala aktivnosti čiji cilj je promocija inicijative za proglašenje Svjetskog dana izbora.

Ove godine je u periodu od 15. januara do 15. februara organiziran „**Mjesec promocije slobodnih i demokratskih izbora**“ sa nizom programskih aktivnosti.

Prijedlog programa koji je objavljen na web stranici Centralne izborne komisije BiH, dostavljen je svim općinskim/gradskim izbornim komisijama, međunarodnim organizacijama i ambasadama u BiH i objavljen u medijima. Prijedlog programa je uključivao slijedeće aktivnosti:

1. Održavanje svečane sjednice Centralne izborne komisije BiH.
 2. Održavanje svečanih sjednica općinskih/gradskih izbornih komisija.
 3. Organizacija prigodnih predavanja za učenike srednjih škola i/ili studente fakulteta na temu “Demokratski izbori” i simulacija izbora. Ohrabrujemo direktore srednjih škola/dekane i profesore fakulteta da organiziraju ovu aktivnost u suradnji sa općinskim/gradskim izbornim komisijama.
 4. Predavanja za učenike srednjih škola na temu “Uključivanje mladih ljudi u javni život na lokalnom nivou u BiH” (rad općine i općinskih vijeća) – projekat Udruženja izbornih zvaničnika u BiH (UIZBiH)- za više informacija kontaktirati UIZBIH na tel. +387 33 476 881.
 5. Promocija važnosti izbora i biračkog prava sa naglaskom na mlade birače koji glasaju prvi put. Ohrabrujemo općinske/gradske izborne komisije da organiziraju nagradni natječaj za izradu:
 - najboljeg slogana ili
 - motivirajućeg radio spota ili
 - motivirajućeg TV spota
 - najboljeg postera ili
 - najbolje fotografije ili
 - najboljeg eseja na temu “Moji prvi izbori-moja očekivanja”.
- Pobjednički radovi bi mogli biti korišteni u kampanji edukacije i motivacije koju provodi Centralna izborna komisija BiH.
6. Prezentacije novih tehnologija u izbornom procesu.
 7. Saradnja tijela za provedbu izbora u zemlji i izvan zemlje u cilju razmjene iskustava i naučenih lekcija.

Dana 14. januar 2016. godine Centralna izborna komisija BiH je u prostorijama Parlamenta Federacije BiH ugostila studente Filozofskog fakulteta Sveučilišta u Mostaru. U okviru posjete dr. Ahmet Šantić, predsjednik i gđin. Vlado Rogić, član Centralne izborne komisije BiH su za studente održali predavanje na temu „**Zakonski koncept i funkcioniranje izbornog sistema u BiH**“. Na ovaj način studenti su se uz teoretska znanja obrazovali i o važnim aspektima zakonskog koncepta izbornog sistema i njegovog funkcioniranja u BiH kroz praktičnu nastavu.



Predavanje za studente Filozofskog fakulteta Sveučilišta u Mostaru
Sarajevo, 14.01.2016. godine

Općinska izborna komisija Novi Grad Sarajevo je povodom Svjetskog dana izbora u četvrtak, 04.02.2016. godine održala svečanu sjednicu na kojoj su pored članova općinske izborne komisije prisustvovali predstavnici političkih partija koje egzistiraju u ovoj općini, direktori osnovnih i srednjih škola iz Općine Novi Grad Sarajevo i predsjednici odnosno sekretari mjesnih zajednice Općine Novi Grad Sarajevo. U ime Sekretarijata Centralne izborne komisije BiH svečanoj sjednici su prisustvovali Ermin Kos šef Sektora za izbore i IKT i Mustafa Laković, koordinator za rad sa izbornim komisijama. Predsjednik Općinske izborne komisije Novi Grad Sarajevo je u uvodnom obraćanju prisutnim ukazao na značaj izbora u cilju demokratizacije kompletnog društva kao i potrebu da se obilježi ustanovljeni svjetski dan. Također je prisutne podsjetio o važnosti njihove uloge u izbornom procesu: predstavnici političkih partija kao partneri izborne administracije koji predlažu članove biračkih odbora, direktori škola jer se kompletno glasanje obavlja u školama gdje su smještena biračka mjesta i predstavnike mjesnih zajednice zbog njihove važne uloge u informiranju birača. Predstavnici Centralne izborne komisije BiH su u svom obraćanju prisutne obavijestili o svim aktivnostima koje provodi Centralna izborna komisija BiH: kroz rad u Interresornoj radnoj grupi za izmjenu i dopunu izbornog zakonodavstva u BiH, pripremama za naredne Lokalne izbore 2016. godine kao i održavanju prezentacije novih tehnologija u izbornom procesu zakazanu za 09.02.2016. godine. Također su predstavnici Centralne izborne komisije BiH odgovorili na postavljena pitanja vezana za prikupljanje podataka o licima koja će glasati putem mobilnog tima, potrebi da se biračka mjesta nalaze u školama o načinu borbe protiv svih zloupotreba koje se dešavaju na i izvan biračkih mjesta.

Centralna manifestacija promocije inicijative za obilježavanje Svjetskog dana izbora održana je 09. februara 2016. godine u Parlamentarnoj skupštini BiH u Sarajevu u saradnji sa Udruženjem izbornih zvaničnika u BiH i uz finansijsku podršku Ambasade Kraljevine Norveške u BiH te učešće 220 učesnika, predstavnika zakonodavne i izvršne vlasti u BiH, diplomatskog kora, izborne administracije, nevladinog sektora i medija. U sklopu manifestaciju pod nazivom „**Prezentacija upotrebe naprednih tehnologija u izbornom procesu**“ ugledne kompanije (Smartmatic, Smart System Solution, Indra, Scytly i Gemalto) predstavile su izbornu opremu za unapređenje izbornog

procesa, a organizirani su i simulirani izbori na jednom biračkom mjestu upotrebom ePEN tehnologije (elektronska olovka).



Članovi Centralne izborne komisije BiH glasaju na simuliranim izborima



Poslanik Predstavničkog doma Parlamentarne skupštine BiH
glasa na simuliranim izborima

Dana 11. februara 2016. godine Gradska izborna komisija Grada Banja Luka je organizirala regionalni skup kojem su prisustvovala dva člana Centralne izborne komisije BiH i predstavnici nekoliko gradskih/općinskih izbornih komisija, a razgovaralo se o izmjenama i dopunama izbornog zakonodavstva u BiH.

Centralna izborna komisija BiH